

Krađe bebe u Hadžićima: Merhunisi prvi momak poginuo, drugog je brutalno slagala



Sarajevsko Tužilaštvo zatražilo je od Općinskog suda u Sarajevu produženje pritvora za Merhunisu Dedić, osumnjičenu za otmicu bebe u Hadžićima početkom jula ove godine. Ovo je za [Oslobođenje](#) rekao Alem Hamzić, portparol sarajevskog Tužilaštva, pojašnjavajući da je Tužilaštvo produženje pritvora zatražilo zbog opasnosti da bi osumnjičena boravkom na slobodi mogla da pobjegne iz BiH, kao i zbog opasnosti od ponavljanja krivičnog djela.

Dedić je navodno često mijenjala mjesto prebivališta zbog čega Tužilaštvo sumnja da bi boravak na slobodi mogla iskoristiti tako što bi pobjegla iz BiH.

Konačnu odluku će donijeti Sud nakon održane sjednice koja je zakazana u petak, a koja će biti zatvorena za javnost.

Merhunisa Dedić, koju su istražitelji opisali kao natprosječno inteligentnu 28-godišnjakinju, se nakon pogibije bivšeg mladića, udala za drugog iz Visokog. Njemu je u augustu prošle godine, tokom ljetovanja, slagala da je trudna, iako nije bila, nakon čega je, vjerovatno, počela smišljati pakleni plan kako da zavara supruga.

Prvo je tražila od ljekara da joj izdaju potvrdu da je

izgubila bebu, no kako je nije dobila, morala je da se domogne tuđeg novorođenčeta kako bi potkrijepila svoju laž o trudnoći...

Počela se namjerno debljati, a suprugu je povremeno govorila da ide na kontrole u bolnicu u Sarajevo. Jedno vrijeme im je govorila da zbog rizične trudnoće mora "ležati" na GAK-u gdje su je suprug i njegovi roditelji posjećivali.

Dedić, koja je završila Medicinsku školu u Kiseljaku, a nakon toga i Prirodno-matematički fakultet u Sarajevu (Odsjek hemija), počela je navodno stažirati na Ginekološko-akušerskoj klinici (GAK). Kako smo saznali od izvora bliskog istrazi ona je stažirala četiri dana u sedmici.

Istražitelji uključeni u istragu protiv Merhunise Dedić nerado govore o ovom slučaju, a na svako pitanje odgovaraju da je istraga u toku. Ona je navodno prije krađe djeteta od porodice Ismailovski pokušala ukrasti još dvoje novorođenčadi od druge dvije porodice, ali je odustala od toga jer su kuće u kojima su bile bebe, bile puna.

Tako je 5. jula odlučila da ukrade novorođenče od Lejle Ismailovski Iz Hadžića. Prethodno je Dedićeva u jednoj rent-a-car kući iznajmila bijelu škodu fabiu, te 4. jula nazvala Lejlu rekavši joj da treba donijeti bebu na GAK jer bebi nalazi štitne nisu bili u redu, a ona je otišla u Hadžiće, gdje je ušla u kuću Ismailovski pod izgovorom da je patronažna sestra koja je došla da pregleda bebu. Tu je bebinu tetku zaključala u kupatilo, te je pobjegla s bebom. Osam sati poslije je uhapšena.